



*Senin, 05 Agustus 2024*

**Ogen: Sakaria 6:1-8**



**"Empat Kereta Perang"**



**S**akaria 6:1-8 e me pengenehnen kerna empat gereta perang. Empat gereta perang e igambarkan alu : gereta perang si pemena kuda megara ngerintaksa; gereta perang peduaken kuda mbiring ngerintaksa; gereta perang si peteluken kuda mbentar ngerintaksa janah gereta perang si peempatkan kuda mekambing ngerintaksa, janah antusen si ituriken malaikat kerna gereta kuda e e me angin si empat si rehna i bas adep-adepen Tuhan nari. Pengenehnen enda nuriken kerna kinimbisan Tuhan si sembah kita e, maka arah teptep mata angin Tuhan erdahin dengen nuduhkan kuasaNa si lanai lang-lang belinna. Pengenehnen enda pe nuriken maka Tuhan erkuasa nandangi doni rikut pe ras isina kerina. Enda me pengenehnen si perpudi si iidah Sakaria. Malekat Tuhan ncidahkan kerna kinimbisan kuasa Tuhan si ituduhkan arah gereta perang si irintak alu kuda. Janah kuda-kuda e ndarat arah dua deleng tembaga. Empat gereta perang rikut ras kuda si ngerintaksa e me simbol kerna doni rikut ras isina kerina. Simbol e tujunna gelah sura-sura Dibata tersehi dengen kemuliaNa tetap teridah i belang-belang doni.

Pedas kal perubahren si jadi i doni enda. Kai si lit gundari, banci saja dua entah telu tahun nari lanai lit; roda kegeluhen tetap erputar, si enda ncidahkan maka kegeluhen manusia la lit si tahan rasa lalap. Doni rikut ras kerina isina si itepa Dibata melala kelemahen dengen keterbatasan bas dirina; janah ise singlarapken gegeh man kuasa manusia kedungenna pasti kecewa dengen ndatken kiniseran. Kalak si tergantung man gegeh doni enda, e me tindakken si bodoh, sabap doni enda la ergegeh. Erkiteken kurangna kengasupen manusia ngidah kelemahen si lit bas doni enda e maka megati nge kita itokohi doni enda.

Empat gereta perang nandaken kuasa Tuhan, e maka patutlah kita tetap erpengarapen dengen ernalem man baNa saja. Janah pengarapenta e sidadhen arah orat geluhta i bas kerina dampar.